

Sarajevo, 05.04.2019.godine

Klub zastupnika u Predstavničkom domu  
Parlamenta Federacije BiH  
Zastupnik Irfan Čengić

ZA:  
BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE BOSNE I HERCEGOVINE  
PREDSTAVNIČKI DOM  
n/r Predsjedavajućeg PD Parlamenta FBiH

Bosna i Hercegovina  
Federacija Bosne i Hercegovine  
PARLAMENT FEDERACIJE  
SARAJEVO

Primljeno:	08-04-2019		
Org. jed.	Br. u l.	Priloz.	Vegetinac
01-	02-	762/19	

U skladu sa članom **163. Poslovnika** o radu Predstavničkog doma Parlamenta Federacije Bosne i Hercegovine, u redovnoj parlamentarnoj proceduri podnosim:

**Nacrt**


**Zakona o sportskim klubovima u Federaciji Bosne i Hercegovine.**

Molim vas da tekst Nacrta zakona uputite Vladi Federacije BiH radi dostavljanja mišljenja u poslovničkom roku od 30 dana.

U prilogu Vam dostavljam tekst Nacrta zakona

S poštovanjem,

Irfan Čengić, zastupnik



BOSNA I HERCEGOVINA  
FEDERACIJA BOSNE I HERCEGOVINE  
PARLAMENT FEDERACIJE BOSNE I HERCEGOVINE  
PREDSTAVNIČKI DOM  
KLUB ZASTUPNIKA SDP BIH  
ZASTUPNIK IRFAN ČENGIĆ

(NACRT)

ZAKON  
O SPORTSKIM KLUBOVIMA U FEDERACIJI BOSNE I HERCEGOVINE.

Sarajevo, april 2019.godine

ZAKON  
O SPORTSKIM KLUBOVIMA U FEDERACIJI BOSNE I HERCEGOVINE.

**I- OPĆE ODREDBE**

**Član 1.  
(Opće odredbe)**

(1) Ovim zakonom uređuju se: osnivanje, pravni položaj, registracija, imovina, prestanak rada i brisanje iz Registra, statusne promjene i druga pitanja značajna za rad sportskih klubova u Federaciji Bosne i Hercegovine( u daljem tekstu: „federacija“ ili „FBiH“).

(2) Zakonom se uređuje i preoblikovanje sportskih klubova - udruženja za takmičenje u sportska dionička društva, osnivanje i djelokrug Komisije za sportska dionička društva, članstvo u sportskom dioničkom društvu, ograničenja u sudjelovanju u kapitalu sportskog dioničkog društva, upotreba dobiti, uslovi pretvaranja tražbina u uloge u sportskom dioničkom društvu, uslovi i način ustupanja naziva i brenda sportskog kluba, te uslove prenošenja tražbina Federacije na jedinice lokalne samouprave.

(3) Profesionalni sportski klub osniva se i registrira kao pravno lice u skladu sa Zakonom o sportu Bosne i Hercegovine ("Službeni glasnik BiH" broj 27/08, 102/09 66/16) , Okvirnim zakonom o registraciji poslovnih subjekata u Bosni i Hercegovini ("Službeni glasnik BiH", br. 42/04, ovim Zakonom i drugim zakonima koji regulišu rad pravnih lica osnovanih na osnovu ovog Zakona.

**Član 2.  
(Primjena Zakona o sportu u Bosni i Hercegovini)**

Na pitanje pojmova i funkcionisanja sportskih klubova u sistemu sportskih takmičenja i na pitanja principa u organiziranju sporta, organizacije i rada u oblasti sporta, primijenit će se odredbe Zakona o sportu u Bosni i Hercegovini.

**Član 3.  
(Pravna lica u sistemu sportskih klubova)**

Sportski klubovi u Federaciji BiH kao pravna lica mogu djelovati u obliku:

- a) sportskog kluba- udruženja građana
- b) sportskog kluba- dioničkog društva

## **II- SPORTSKI KLUBOVI- UDRUŽENJA GRAĐANA**

### **Član 4.**

#### **(Pojam sportskog kluba- udruženja građana)**

Sportskim klubom – udruženjem građana za takmičenje će se u smislu ovog Zakona smatrati udruženjima građana koja obavljaju sportsku djelatnost učešća u sportskim takmičenjima, a koji su registrovani na osnovu odredbi zakona koji uređuju osnivanje, unutrašnju organizaciju, registraciju, prestanak udruženja i fondacija u Bosni i Hercegovini.

### **Član 5.**

#### **(Jednako tretiranje sportskih klubova- udruženja građana)**

Ovaj Zakon će na jednak način tretirati sportske klubove – udruženja za takmičenje koji su registrovani na nivou Bosne i Hercegovine, Federacije Bosne i Hercegovine ili na nivou kantona.

### **Član 6.**

#### **(Sjedište sportskog kluba- udruženja građana)**

Sportski klub – udruženje građana za takmičenje mora imati sjedište na području entiteta Federacija Bosna i Hercegovina kako bi se na njega mogle primijeniti odredbe ovog Zakona.

### **Član 7.**

#### **(Primjena zakona na sportske klubove-udruženje građana)**

Za osnivanje, unutrašnju organizaciju, registraciju, rad, prestanak rada udruženja sportskih klubova-udruženja građana primjenjuje se Zakon o udruženjima i fondacijama Bosne i Hercegovine i Zakon o udruženjima i fondacijama Federacije Bosne i Hercegovine.

### **Član 8.**

#### **(Nastavak rada postojećih sportskih klubova- udruženje građana)**

(1) Svi sportski klubovi koji su registrovani na osnovu postojećih zakona koji tretiraju udruženja građana i fondacije do dana usvajanja ovog Zakona nastavljaju sa daljim radom kao sportski klub-udruženje građana.

(2) Svi sportski klubovi- udruženja građana su dužni u roku od 6 mjeseci od dana stupanja na snagu ovog zakona uskladiti unutrašnju organizaciju u skladu sa ovim Zakonom.

### **III- SPORTSKI KLUBOVI- DIONIČKA DRUŠTVA**

#### **Član 9.**

##### **(Pojam sportskog kluba- dioničkog društva)**

(1) Sportski klub- dioničko društvo (u daljnjem tekstu: Društvo) je sportski klub koji se osniva, djeluje i prestaje prema Zakonu o privrednim društvima Federacije BiH i drugim propisima koji se primjenjuju na dionička društva, ako ovim Zakonom nije drugačije određeno.

#### **Član 10.**

##### **(Primjena Zakona o privrednim društvima Federacije BiH)**

Ako ovim Zakonom nije drugačije određeno, pitanje osnivanja, poslovanja, upravljanja i prestanka sportskih dioničkih društava primijenit će se odredbe Zakona o privrednim društvima Federacije Bosne i Hercegovine.

#### **Član 11.**

##### **(Skracenica sportskog kluba- dioničkog društva)**

Preduzeće sportskog dioničko društva mora sadržavati riječi „sportsko dioničko društvo“, a skraćeno oznaku „s. d. d.“.

#### **Član 12.**

##### **(Osnovna djelatnost sportskog kluba- dioničkog društva)**

(1) Društvo obavlja osnovnu djelatnost „93.12 Djelatnost sportskih klubova,“ učešća u sportskim takmičenjima, a može obavljati i druge sportske djelatnosti i druge djelatnosti u skladu sa odredbama ovog Zakona.

(2) Društvo može obavljati i druge djelatnosti prema Zakonu o privrednim društvima Federacije BiH i drugim propisima koji se primjenjuju na dionička društva, ako ovim Zakonom nije drugačije određeno.

#### **Član 13.**

##### **(Komisija za sportska dionička društva)**

(1) Komisija za sportska dionička društva (u daljnjem tekstu: Komisija) osniva se kao stručno tijelo radi praćenja obavljanja djelatnosti sportskih dioničkih društava.

(2) Komisija ima sedam članove koje imenuje Vlada Federacije:

- dva člana na prijedlog Federalnog ministarstva finansija
- dva člana na prijedlog Federalnog ministarstva kulture i sporta
- dva promjenjiva člana na prijedlog sportskog saveza na nivou Bosne i Hercegovine čiji je član sportski klub na koji se odnosi odluka koju Komisija treba donijeti;
- jedan stalni član Komisije na prijedlog Olimpijskog komiteta Bosne i Hercegovine.

(3) Mandat Komisije traje četiri godine, svaki član komisije tu dužnost može obavljati u više mandata.

(4) Komisija obavlja sljedeće poslove:

- vodi evidenciju o dokumentaciji koju su mu dužni slati sportska dionička društva;
- utvrđuje iznos temeljnog kapitala u slučaju preoblikovanja sportskog kluba-udruženja za takmičenje u sportsko dioničko društvo;
- daje saglasnosti propisane ovim Zakonom;
- vodi evidenciju o dioničarima u sportskim dioničkim društvima,;
- prima obavještenja o sticanju dionica;
- daje saglasnost na sticanje dionica;
- daje obavještenja o sticanju dionica;
- predlaže pokretanje stečajnog postupka.

(5) Odluke Komisije donose se većinom od prisutnih članova.

(6) Djelokrug i način rada Komisije detaljnije se uređuje Pravilnikom koji donosi Vlada Federacije.

#### **Član 14. (Nastanak društva)**

(1) Društvo može nastati:

- a) Osnivanjem novog društva.
- b) Preoblikovanjem sportskog kluba – udruženja za takmičenje u sportsko dioničko društvo.

(2) Preoblikovanje nije obavezujuće za sportske klubove-udruženja.

(3) Svaki sportski klub – udruženje za takmičenje može se preoblikovati bez obzira da li isti ima profesionalni ili amaterski status i bez obzira na sport u kojem se takmiči.

#### **Član 15. (Temeljni kapital društva)**

(1) Temeljni kapital Društva iznosi najmanje 50.000,00 konvertibilnih maraka.

(2) Društvo može izdati samo redovne dionice na ime sa nominalnim iznosom, nominalna vrijednost dionice ne može biti manja od 10 konvertibilnih maraka.

(3) Ako se osnovni kapital prilikom osnivanja dioničkog društva, osim ulozima u novcu, obezbjeđuje i ulozima u stvarima i pravima, ukupni ulozi u novcu ne mogu biti manji od 50.000 KM.

#### **Član 16. (Članstvo u Društvu)**

(1) Društvo mogu osnovati i biti njegovim članom domaća i strana, fizička i pravna lica.

(2) Jedno lice ne može imati dionice u više društava istog sporta u iznosu višem od 1% ukupnog temeljnog kapitala u bilo kojem od tih Društava.

(3) Stav (2) ovog člana se ne primjenjuje na jedinice lokalne samouprave.

(4) Dionice u Društvu, direktno, indirektno ili preko povezanih lica ne mogu imati lica čiji poslovi i djelatnosti mogu neposredno utjecati na sistem takmičenja u odgovorajućem sportu, a posebno sportisti, sportski suci, menadžeri u sportu i lica koji su članovi pravnih lica koje obavljaju djelatnost organizovanja sportskih kladionica.

(5) Dionice u Društvu, direktno, indirektno ili preko povezanih lica ne može imati društvo koje obavlja djelatnost učešća u takmičenjima istog sporta.

#### **Član 17.**

##### **(Ograničenje i saglasnost za sticanje značajnog sudjelovanja u temeljnom kapitalu)**

(1) Jedno lice može direktno, indirektno ili preko povezanih lica u društvu imati dionice na koje otpada više od 33% temeljnog kapitala društva samo uz saglasnost Komisije za sportska dionička društva.

(2) Pri davanju saglasnosti iz stava (1) ovog člana posebno se vodi računa o interesima društva, sistema takmičenja u tom sportu te posljedicama koje bi mogle nastati ako saglasnost ne bude dana.

#### **Član 18.**

##### **(Obavješćavanje o sticanju značajnog učešća u temeljnom kapitalu sportskog dioničkog društva)**

(1) O svakom sticanju dionica koje se zajedno s dionicama koje to lice već ima, direktno, indirektno ili preko povezanih osoba, odnose na najmanje 5% temeljnog kapitala društva sticatelj mora bez odgađanja, a najkasnije u roku od osam dana od dana sklapanja pravnog posla koji je osnova stjecanja, obavijestiti Komisiju.

(2) O svakom daljnjem sticanju dionica koje se odnose na najmanje 5% temeljnog kapitala društva sticatelj mora bez odgađanja, a najkasnije u roku od osam dana od dana sklapanja pravnog posla koji je osnova sticanja, obavijestiti Komisiju.

#### **Član 19.**

##### **(Povezana lica)**

(1) Smatra se, u smislu ovog Zakona, da su lica koje stiču dionice u društvu povezane:

- ako su ugovorile da usklađeno djeluju u vezi sa sticanjem dionica izdavaoca ili u vezi s ostvarivanjem prava glasa prema izdavaocu;
- ako jedna od njih drži dionice za račun druge ili - ako jedna od njih direktno ili indirektno kontroliše drugu ili druga pravna lica.

(2) Smatra se da fizičko ili pravno lice kontroliše pravno lice ako ima:

- direktno ili indirektno većinski udio u temeljnom kapitalu tog lica,

- direktno ili indirektno većinu glasačkih prava u tom licu,
- pravo imenovati ili opozvati većinu članova uprave ili nadzornog odbora, odnosno drugog tijela koje upravlja ili vodi poslovanje tog lica ili
- na neki drugi način prevladavajući utjecaj na to lice.

(3) Smatra se da fizička lica djeluju zajednički ako su u krvnom srodstvu (preci i potomci), braća i sestre i njihovi potomci, ako su bračni ili vanbračni drugovi te u odnosu usvojilac-usvojenik.

#### **Član 20.** **(Posljedice protivpravnog sticanja dionica)**

(1) Sticatelj koji je stekao dionice suprotno odredbama ovoga Zakona, dužan je bez odgađanja otuđiti te dionice koje je stekao, premda na to nije imao pravo. Dok to ne učini, ne može ostvarivati nikakva prava ni iz jedne dionice niti u jednom društvu u kojem drži dionice.

(2) Prava iz tih dionica ostvaruje povjerenik kojeg imenuje Komisija. Povjerenik ne može biti lice na koje se odnose ograničenje i zabrana stjecanja dionica ovoga Zakona niti s tom licem povezanog lica.

(3) Povjerenik ne može biti niti lice koje je dioničar toga društva pa bi kroz ostvarivanje prava iz tih dionica, zajedno s dionicama koje ima kao dioničar, to lice bila obuhvaćena obavezom dobivanja saglasnosti iz člana 10. ovoga Zakona.

(4) Svako lice koje za to sazna na ikoji način mora obavijest o tome da je neka osoba stekla dionice suprotno odredbama člana 10. ovoga Zakona bez odgađanja u pisanom obliku dostaviti Komisiji, koje će o tome izvijestiti Društvo.

(5) Društvo je dužno bez odgađanja obavijestiti Komisije o sazivanju svake glavne skupštine u vrijeme dok prava iz dionica u društvu ostvaruje povjerenik. Povjerenik mora sudjelovati u radu glavne skupštine te se na njegov zahtjev u zapisnik s glavne skupštine mora unijeti napomena da glasa lice koja na to nema pravo jer je stekla dionice suprotno odredbama člana 11. ovog Zakona.

#### **Član 21.** **(Posljedice neobavještanja o sticanju značajnog sudjelovanja u temeljnom kapitalu sportskog dioničkog društva)**

Ako neko lice u skladu s članom 11. ovog Zakona ne ispuni svoju obvezu obavještanja Povjerenstva o sticanju značajnog sudjelovanja u temeljnom kapitalu sportskog društva, na odgovarajući se način primjenjuju posljedice protupravnog stjecanja dionica iz člana 13. ovoga Zakona glede ostvarivanja prava u društvu, imenovanja povjerenika i odvijanja glavne skupštine društva.

#### **Član 22.** **(Upotreba dobiti sportskog dioničkog društva)**

(1) Na upotrebu neto dobiti društva primjenjuju se odredbe Zakona o privrednim društvima, ako odredbama ovoga Zakona nije određeno drugačije.



(2) Zakonskim rezervama društva u smislu ovoga Zakona smatraju se i posebne zakonske rezerve u koje se mora unositi dio neto dobiti Društva, pored iznosa koji se unose u zakonske rezerve određene općim propisima.

(3) U posebne zakonske rezerve Društva moraju se unositi iznosi u visini najmanje polovine neto dobiti koja preostane nakon što se, u skladu sa odredbama Zakona o privrednim društvima, podmire gubici iz ranijih godina te zakonske rezerve.

(4) Posebne zakonske rezerve društva iz stava (3) ovoga člana smiju se koristiti samo za obavljanje i unapređenje sportske djelatnosti sportske pripreme djece.

### **Član 23.**

#### **(Članstvo u tijelima sportskog dioničkog društva)**

(1) Ista fizička osoba može biti član uprave ili nadzornog odbora samo u jednom društvu istog sporta.

(2) Uz lica koja ne mogu biti članovi uprave ili nadzornog odbora dioničkog društva prema odredbama Zakona o privrednim društvima, članovi uprave i nadzornog odbora društva ne mogu biti ni lica:

- koja su u posljednje tri godine pravosnažno osuđena za krivična djela ili prekršaje u sportu i u vezi sa sportom;
- koja su članovi sportskih klubova-udruženja za takmičenje istog sporta;
- koja su dioničari društva istog sporta;
- koja su članovi tijela, osobe ovlaštene za zastupanje te osobe ovlaštene za vođenje poslova po odluci ovlaštenog tijela ili na temelju općih akta sportskog kluba – udruženja za takmičenje istoga sporta;
- koja su članovi tijela društva istog sporta;
- koja svojim djelovanjem mogu neposredno utjecati na sistem takmičenja u odgovarajućem sportu, a posebno sportisti, menadžeri u sportu, kao i osobe koje su to bile u razdoblju posljednjih godinu dana;
- članovi pravnih lica koje obavljaju djelatnost organiziranja sportskih kladionica, kao i osobe koje su to bile posljednje pet godina,
- članovi tijela pravnih osoba koje obavljaju djelatnost organiziranja sportskih kladionica, kao i lica koja su to bila posljednjih pet godina,
- koja s menadžerima u sportu i članovima pravnih lica te članovima tijela pravnih lica koje obavljaju djelatnost organiziranja sportskih kladionica.

(3) U slučaju dvojbe, mišljenje o tome jesu li ispunjeni razlozi zbog kojih neko lice ne može biti članom uprave ili nadzornog odbora Društva, a posebno o tome bi li zbog svog djelovanja mogle neposredno utjecati na sistem takmičenja u odgovarajućem sportu, daje Komisija.

(4) Komisija može mišljenje dati na vlastitu inicijativu ili na prijedlog zainteresovanog lica.

**Član 24.**  
**(Obaveza obavještanja Komisije)**

(1) Društvo mora Komisiji i pripadajućem krovnom sportskom savezu redovno, bez odgađanja, slati obavještenja o svim važnijim poslovnim događajima, a posebno o:

- ugovorima koje Društvo sklapa sa članovima uprave i nadzornog odbora Društva, osim ugovora o obavljanju poslova članova uprave odnosno nadzornog odbora za Društvo,
- ugovorima koje Društvo sklapa s dioničarima Društva koji drže najmanje 5 % dionica Društva,
- ugovorima koje Društvo sklapa s drugim osobama čije djelovanje može imati utjecaj na obavljanje djelatnosti Društva.

(2) Jednom godišnje Društvo mora Komisiji podnositi sljedeće dokumente:

- račun dobiti i gubitka,
- izvještaj o registrovanim sportistima seniorskih ekipa,
- godišnji finansijski izvještaj,
- plan poslovanja u idućoj poslovnoj godini,
- revizorski izvještaj.

(3) Način i rokove podnošenja akata iz stava (2) ovoga člana pobliže Pravilnikom uređuje Vlada.

**Član 25.**  
**(Obaveza provođenja revizije)**

(1) Klubovi koji se preoblikuju u sportska dionička društva dužni su u roku od dva mjeseca od dana dostave rješenja o upisu u Registar profesionalnih sportskih klubova obaviti reviziju, koja se provodi u skladu s odredbama Zakona o reviziji.

(2) Zadaća revizora je utvrditi jesu li ostvareni uvjeti za pokretanje stečajnog postupka sukladno posebnim propisima, odnosno uvjeti za obvezno preoblikovanje u sportsko dioničko društvo.

(3) U okviru revizije posebno se mora utvrditi popis i procjena vrijednosti imovine, popis svih tražbina prema profesionalnom sportskom klubu navedenih prema vrstama vjerovnika i njihovoj visini, pregled poslovanja profesionalnog sportskog kluba u proteklih pet godina, uz posebno iskazane prihode i rashode profesionalnog sportskog kluba u tome razdoblju, pobliži opis na što se oni odnose te godišnje račune dobiti i gubitka profesionalnog sportskog kluba u tome razdoblju, procjenu na razini jedne godine, prava igranja na javnoj sportskoj građevini za koju profesionalni sportski klub ima koncesiju te prema pravilima struke utvrditi vrijednost tražbina prema profesionalnom sportskom klubu, a pri čemu posebno treba voditi računa o:

- vrijednosti imovine i obaveze profesionalnog sportskog kluba,
- sposobnosti profesionalnog sportskog kluba da podmiruje svoje dospjele obveze,
- okolnosti je li profesionalni sportski klub u proteklom razdoblju uredno podmirivao svoje dospjele obveze,
- tome može li i u kojem roku i na koji način profesionalni sportski klub bez dodatnih ulaganja uopće podmiriti svoja dugovanja,

– tome kakvo bi, bez dodatnih ulaganja, bilo očekivano poslovanje profesionalnog sportskog kluba u budućnosti, koje se utvrđuje prema razumnim gospodarskim mjerilima.

(4) Klub je obavezan je zatražiti saglasnost Komisije na izbor revizora.

(5) Klub je obavezan odmah nakon obavljene revizije, dostaviti revizorski izvještaj Federalnom ministarstvu finansija i Komisiji.

#### **IV- POSTUPAK PREOBLIKOVANJA**

##### **Član 26. (Postupak preoblikovanja)**

- (1) Ovlašteno tijelo sportskog kluba-udruženja za takmičenje pokreće postupak preoblikovanja sportskog kluba-udruženja za takmičenje u sportsko dioničko društvo.
- (2) Postupak preoblikovanja započinje izradom elaborata koji mora sadržavati:
  1. izvještaj ovlaštenog revizora o stanju imovine, pravima i obavezama sportskog kluba-udruženja za takmičenje,
  2. popis i procjenu vrijednosti imovine te popis svih tražbina prema sportskom klubu-udruženju za takmičenje, navedenih prema vrstama povjerilaca i njihovoj visini,
  3. utvrđenje revizora o vrijednosti tražbina prema sportskom klubu-udruženju za takmičenje;
  4. utvrđenje revizora o vrijednosti prava korištenja sportske građevine koje može biti ulog u temeljni kapital s.d.d.-a,
  5. pregled poslovanja sportskog kluba-udruženja za tamičenje u proteklih pet godina, uz posebno iskazane prihode i rashode sportskog kluba-udruženja za tamičenje u tome razdoblju, poblizi opis na što se oni odnose te godišnje račune dobiti i gubitka sportskog kluba-udruženja za tamičenje u tome razdoblju,
  6. popis članova sportskog kluba-udruženja za tamičenje,
  7. popis članova tijela sportskog kluba-udruženja za tamičenje,
  8. opis nadležnosti i međusobnog odnosa tijela sportskog kluba-udruženja za tamičenje,
  9. sportske rezultate sportskog kluba-udruženja za takmičenje barem u posljednjih pet takmičarskih sezona, broj reprezentativaca u svim kategorijama, ugovorne vrijednosti sportista-takmičara s kojima sportski klub-udruženje za takmičenje ima ugovor, broj mladih sportista po kategorijama;

10. potencijalne dioničare Društva, pri čemu se posebno iskazuju vjerovnici sportskog kluba-udruženja za takmičenje, na temelju njihovog očitovanja na pisani poziv koji im mora uputiti sportski klub-udruženje za takmičenje, da iskažu svoj interes za pretvaranjem tražbina u ulog u Društvu,

11. procjenu potrebnih dodatnih sredstava za obavljanje djelatnosti Društva,

12. procjenu vrijednosti prava igranja na sportskoj građevini koju je utvrdio ovlašteni revizor i iskaz jedinice lokalne samouprave, u čijem je vlasništvu predmetna sportska građevina, o roku na koji bi sportski klub-udruženje za natjecanje imala pravo igranja,

13. prijedlog iznosa temeljnog kapitala Društva,

14. nacrt statuta Društva u koje se preoblikuje sportski klub-udruženje za takmičenje u kojem mora biti odredba da će u roku od dva mjeseca od dana upisa Društva u odgovarajuće registre, Društvo donijeti odluku o povećanju temeljnog kapitala radi pretvaranja tražbina vjerovnika prema Društva u uloge,

15. popis pravnih lica u kojima je sportski klub-udruženje za takmičenje član, a osobito privrednih društava u kojima je sportski klub-udruženje za takmičenje član uz precizno navođenje visine udjela i prava koje udruženje ima u tim privrednim društvima, te popis pravnih lica preko kojih je sportski klub-udruženje za takmičenje obavljala sportske djelatnosti,

16. opis toka poslovanja pravnih osoba iz točke 15. ovoga stava,

17. obrazloženje razloga zbog kojih je sportski klub-udruženje za takmičenje svoju djelatnost, osim sudjelovanja u sportskim takmičenjima, obavljala preko pravnih osoba iz tačke 15. ovoga stava.

(3) Poziv iz stava 2. tačke 10. ovoga člana sportski klub-udruženje za takmičenje mora uputiti svakom vjerovniku lično.

(4) U pozivu se mora navesti da je sportski klub-udruženje za takmičenje pristupa postupku preoblikovanja, kao i kolika je vrijednost tražbina vjerovnika kojem se poziv upućuje, a utvrđena u postupku revizije te ga pozvati da se pisanim putem očituje ima li interesa za to da svoju tražbinu pretvori u ulog u Društvu kroz postupak povećanja temeljnog kapitala nakon okončanog postupka preoblikovanja odnosno kroz postupak pretvaranja tražbine u ulog u Društvu u petom krugu, u skladu sa ovim Zakonom.

(5) Vjerovnik koji ne želi pretvoriti svoju tražbinu u ulog u Društvu ostaje vjerovnik Društvu.

(6) Odluku o povećanju temeljnog kapitala pretvaranjem tražbina u uloge donosi uprava Društva i zamjenjuje odluku glavne skupštine. Pravo na pretvaranje tražbina za ulog imaju svi vjerovnici Društva, pa i oni koji na poziv iz stava 3. ovoga člana nisu iskazali takav interes.

(7) Temeljni kapital povećava se za iznos zbira na temelju utvrđenih vrijednosti tražbina svih vjerovnika. Na provođenje povećanja temeljnog kapitala na odgovarajući se način

primjenjuju odredbe općih propisa o uslovnom povećanju temeljnog kapitala.

(8) Elaborat iz stava 2. ovoga člana, sportski klub-udruženje za takmičenje mora dostaviti nacionalnom sportskom savezu i Komisiji. Nacionalni sportski savez se o tom elaboratu mora očitovati u roku od petnaest dana od dana dostave elaborata te je svoje očitovanje dužan dostaviti sportskom klubu-udruženju za takmičenje i Komisiji.

(9) Sportski klub-udruženje za takmičenje može u roku od petnaest dana od dana dostave očitovanja nacionalnog sportskog saveza dostaviti Komisije primjedbe na isto.

(10) Komisija je dužna, u roku od mjesec dana od dana prijema elaborata dati saglasnost na elaborat te utvrditi početni iznos temeljnog kapitala ili može elaborat poslati sportskom klubu-udruženju za takmičenje na doradu. Komisija može, prije davanja saglasnosti, zatražiti mišljenje nezavisnih stručnjaka i organizacija.

(11) Početni iznos temeljnog kapitala utvrđuje se tako da on predstavlja najmanje iznos od 25% prosječnih godišnjih rashoda sportskog kluba-udruženja za takmičenje u proteklih pet godina. Pri izračunavanju prosječnog godišnjeg rashoda ne računa se ona godina u kojoj je rashod bio najmanji u tih pet godina kao ni ona godina u kojoj je rashod bio najveći u tih pet godina.

#### **Član 27.**

##### **(Rješenje o preoblikovanju)**

(1) Ministar finansija, u roku od mjesec dana od dana dostavljanja revizorskog izvještaja, uz prethodnu saglasnost Komisije, rješenjem utvrđuje da su ispunjeni uslovi za preoblikovanje.

(2) Komisija je dužno dati saglasnost u roku od 15 dana od dana prijema revizorskog izvještaja i druge dokumentacije propisane Zakonom.

(3) Rješenje je konačno i protiv njega se može pokrenuti upravni spor.

#### **Član 28.**

##### **(Upis i uplata dionica)**

(1) Nakon što da saglasnost na elaborat i utvrdi temeljni kapital društva, Komisija o tome obavještava sportski klub-udruženje za takmičenje i nacionalni sportski savez.

(2) U roku od petnaest dana od dana dostave obavještenja iz stava (1) ovoga člana sportski klub-udruženje za takmičenje upućuje poziv na upis i uplatu dionica, na šta se, ako ovim Zakonom nije drugačije određeno, na odgovarajući način primjenjuju odredbe o sukcesivnom osnivanju dioničkog društva.

(3) Sportski klub-udruženje za takmičenje upućuje poziv na upis i uplatu dionica u četiri kruga:

1. u prvom krugu poziv se upućuje jedinici lokalne samouprave u kojoj je sjedište sportskog kluba – udruženja za takmičenje,

2. ako se u prvom krugu ne upišu i uplate sve dionice u roku koji ne može biti kraći od petnaest dana niti duži od mjesec dana, preostali neupisani dio dionica mogu uplatiti članovi sportskog kluba-udruženja za takmičenje na koje otpada razmjerno jednak dio temeljnog kapitala,

3. ako se i nakon drugog kruga ne upišu i ne uplate sve dionice u roku koji ne može biti kraći od petnaest dana niti duži od mjesec dana, preostali neupisani dio dionica mogu uplatiti članovi sportskog kluba-udruženja za takmičenje, koji su upisali i uplatili dionice u drugom krugu razmjerno svojim uplatama u drugom krugu,

4. za preostali neupisani dio dionica upućuje se poziv javnosti na upis i uplatu dionica, a u tom krugu, koji ne može biti kraći od petnaest dana niti duži od mjesec dana, mogu učestvovati i članovi sportskog kluba-udruženja za takmičenja koji su već upisali i uplatili dionice u prethodna dva kruga, kao i oni koji to nisu učinili,

5. ako i nakon četvrtog kruga nisu upisane i uplaćene sve dionice, Komisija iznimno može, vodeći računa o interesima sporta, dopustiti upućivanje poziva za upis i uplatu dionica u petom krugu, koji ne može biti kraći od petnaest dana niti duži od mjesec dana, svim vjerovnicima sportskog kluba-udruženja za takmičenje.

(4) Ako i nakon četvrtog, odnosno izuzetno dopuštenog petog kruga nisu uplaćene i upisane sve dionice smatra se da preoblikovanje sportskog kluba-udruženja za takmičenje nije uspjelo.

(5) Dionice se u prvom krugu, u postupku iz stava (3) ovoga članka, mogu uplatiti u novcu i pravu korištenja sportske građevine. Dio koji se uplaćuje u novcu ne može biti manji od 50 000,00 konvertibilnih maraka. Preostale dionice u drugom, trećem i četvrtom krugu mogu se uplatiti samo u novcu.

(6) Nadležno tijelo sportskog kluba-udruženja za takmičenje dužno je nakon okončanog postupka upisa i uplate dionica iz stavka 3. ovoga člana donijeti odluku o prestanku udruženja u skladu sa Zakonom o udruženjima i fondacijama u Federaciji BiH. U tom slučaju ne primjenjuju se odredbe o obavezi pokretanja stečajnog odnosno likvidacijskog postupka u skladu sa posebnim propisom.

## **Član 29. (Pravni kontinuitet)**

(1) Društvo je pravni sljednik sportskog kluba-udruženja za takmičenje koje se preoblikovalo.

(2) Društvo počinje obavljati svoju djelatnost nakon upisa u registar društava i objavljivanja registracije u skladu sa zakonom kojim se uređuje registracija privrednih društava, a na osnovu Rješenja iz člana 20. ovog Zakona.

**Član 30.**  
**(Prenos tražbine)**

(1) Federacija BiH i kantoni u Federaciji BiH mogu prenijeti svoje tražbine prema sportskim klubovima-udruženjima za takmičenje, koja se preoblikuju u društva, na jedinicu lokalne samouprave, u kojoj je sjedište sportskog kluba, prema posebnom ugovoru o prienosu u kojem će se utvrditi prava i obveze ugovornih strana.

(2) Pravna lica u kojima Federacija BiH ima većinski udio ili većinsko pravo glasa mogu prenijeti svoje tražbine prema sportskim klubovima-udruženjima za takmičenje, koja se preoblikuju u društva, na jedinicu lokalne samouprave, u kojoj je sjedište sportskog kluba, prema posebnom ugovoru o prienosu u kojem će se utvrditi prava i obveze ugovornih strana.

(3) Odluku o prienosu tražbina iz ovog člana donosi Vlada Federacije BiH odnosno Vlada kantona.

**V- USTUPANJE NAZIVA I BRENDA SPORTSKOG KLUBA**

**Član 31.**  
**(Pojam naziva i brenda sportskog kluba)**

(1) Naziv sportskog kluba- udruženja predstavlja naziv koji je upisan u odgovarajući Registar na nivou države Bosne i Hercegovine, Federacije Bosne i Hercegovine ili kantona.

(2) Brend sportskog kluba- udruženja predstavlja aktuelni i historijski logo, vizualni identitet kluba, termin, skraćenicu, znak, simbol, dizajn, osvojena sportska postignuća i kombinaciju istih usmjerenu na identifikaciju sportskog kluba i njihovo razlikovanje od drugih sportskih klubova.

**Član 32.**  
**(Odluka o ustupanju naziva i brenda sportskog kluba)**

(1) Odluku o ustupanju naziva i brenda sportskog kluba-udruženja donosi odgovarajuće tijelo sportskog kluba u skladu sa zakonima i aktima sportskog kluba.

(2) Uporedo sa donošenjem odluke o ustupanju naziva i brenda sportskog kluba, sportski klub-udruženje donosi odluku o prestanku rada u skladu sa zakonima koji regulišu prestanak rada udruženja i fondacija.

### **Član 33.**

#### **(Procedura ustupanja naziva i brenda sportskog kluba-udruženja)**

- (1) Naziv i brend sportski klub-udruženje može ustupiti domaćim i stranim fizičkim ili pravnim licima.
- (2) Fizičko ili pravno lice kojem je ustupljen naziv i brend određenog sportskog kluba-udruženja mora u roku od 15 dana pokrenuti proceduru osnivanja sportskog kluba-dioničkog društva u skladu sa ovim Zakonom koje će imati naziv koji je ustupljen.
- (3) Prilikom ustupanja naziva i brenda sportskog kluba-udruženja nije moguće ustupiti pokretnu i nepokretnu imovinu sportskog kluba-udruženja.
- (4) Rješenje o odobrenju ustupanja naziva i brenda sportskog kluba-udruženja donosi Komisija
- (5) Sportski klubovi-dionička društva ne mogu ustupati naziv i brend sportskog kluba
- (6) Sportski klubovi-udruženja ne mogu ustupati naziv i brend drugim sportskim klubovima-udruženjima.

### **Član 34.**

#### **(Takmičenje sportskog kluba kojem je ustupljen naziv i brend)**

- (1) Sportski klub-dioničko društvo koje je nastalo nakon ustupanja naziva i brenda od strane sportskog kluba-udruženja nastavlja sportska takmičenja u skladu sa pravilima koja će odrediti svaki sportski savez zasebno.
- (2) Preuzimanje naziva i brenda od sportskog kluba-udruženja, ne garantira novosonovanom sportskogm klubu-dioničkom društvu takmičenje u razini u kojoj je nastupao sportski klub-udruženje koje je ugašeno nakon ustupanja naziva i brenda.
- (3) Sportski klub- dioničko društvo koje je osnovano sa ustupljenim nazivom i brendom sportskog kluba-udruženja može početi učestvovati u sportskim takmičenjima tek nakon brisanja iz odgovarajućeg registra sportskog kluba-udruženja koje je ustupilo naziv i brend.
- (4) Rješenje o dozvoli za nastupanje u takmičenjima donosi Komisija nakon što se konstatuje da su uslovi iz stava 3. ovog člana ispunjeni.

### **Član 35.**

#### **(Naknada za ustupanje naziva i brenda)**

- (1) Sportski klub-udruženje može za ustupanje naziva i brenda od pravnih i fizičkih lica primiti novčanu naknadu.



(2) Sredstva od naknade iz stava 1. ovog člana moraju biti utrošena u skladu sa ovim Zakonom i zakonima koji tretiraju raspolaganje finansijskim sredstvima udruženja građana i fondacije.

## **VI- FINANSIRANJE SPORTSKIH KLUBOVA OD STRANE DRŽAVE**

### **Član 36. (Javni interes)**

Zakonom o sportu Bosne i Hercegovine sport je definisan kao djelatnost od javnog interesa.

### **Član 37. (Finansiranje iz budžeta)**

(1) Svim nivoima vlasti u Federaciji Bosne i Hercegovine dozvoljeno je finansiranje sportskih klubova kroz grantove i subvencije iz budžeta tih nivoa vlasti kao i preduzeća, zavoda, ustanova u vlasništvu države u skladu sa zakonima.

(2) Finansiranje je dozvoljeno za oba oblika sportskih klubova, odnosno za sportske klubove-udruženja kao i sportske klubove-dionička društva.

## **VII- ZAVRŠNE I PREKRŠAJNE ODREDBE**

### **Član 38. (Prekršajne odredbe)**

(1) Za prekršaj bit će kažnjeno novčanom kaznom u iznosu od 1000,00 KM do 250.000,00 KM Društvo koje obavlja djelatnost protivno odredbama ovog Zakona.

(2) Za prekršaj iz stava (1) ovog člana kaznit će se i odgovorno lice u društvu novčanom kaznom u iznosu od 100,00 KM do 20.000,00 KM.

### **Član 39. (Stupanje na snagu)**

Ovaj zakon stupa na snagu osmog dana od dana objavljivanja u „Službenim novinama Federacije Bosne i Hercegovine“.

## OBRAZLOŽENJE ZAKONA O SPORTSKIM KLUBOVIMA U FEDERACIJI BOSNE I HERCEGOVINE.

### I. USTAVNI OSNOV

Ustavni osnov za donošenje ovog zakona sadržan je u dijelu Poglavlju IV A. 5. 20. (1) d) kojim je propisano da je Parlament Federacije Bosne i Hercegovine nadležan za donošenje zakona o vršenju funkcija federalne vlasti i u članu 20. Zakona o sportu Bosne i Hercegovine ("Službeni glasnik BiH" broj 27/08, 102/09 66/16)

### II. RAZLOZI ZA DONOŠENJE

Članom 20. Zakona o sportu Bosne i Hercegovine ("Službeni glasnik BiH" broj 27/08, 102/09 66/16) propisana je **obaveza** Federaciji Bosne i Hercegovine da svojim propisima reguliše postojanje profesionalnih sportskih klubova kao privrednih društava:

*„ (1) Profesionalni sportski klub osniva se kao privredno društvo, odnosno preduzeće s ciljem obavljanja sportske djelatnosti.*

*(2) Profesionalni sportski klub osniva se i registrira kao poslovni subjekat kod nadležnog suda u skladu s Okvirnim zakonom o registraciji poslovnih subjekata u Bosni i Hercegovini ("Službeni glasnik BiH", br. 42/04) i **odgovarajućim entitetskim zakonima kojima se uređuje osnivanje poslovnih subjekata**, ovim Zakonom i zakonima o sportu entiteta i drugih nivoa administrativnog organiziranja, kao i statutima sportskih saveza.“*

Međutim Federacija BiH niti 11 godina nakon donošenja Zakona o sportu Bosne i Hercegovine nije ispunila svoju obavezu iz državnog zakona i regulisala ovu oblast.

Regulisanje profesionalnih sportskih klubova je nužni korak ukoliko želimo napredak sporta i kvalitetnije rezultate naših sportskih klubova.

Ovaj zakon ima za cilj omogućiti profesionalnim sportskim klubovima da posluju po pravilima privrednih društava i na taj način ostvare kvalitetnije finansiranje kao i kvalitetnije uslove za rad.

Razlog za donošenje ovog Zakona jeste neadekvatna uređenost pitanja mogućnost preoblikovanja postojećih sportskih klubova, registrovanih kao udruženja građana u sportska privredna/dionička društva. Rezultat nepostojanja adekvatnog pravnog okvira za preoblikovanje ove vrste, brojni klubovi se suočavaju sa nestankom, a ekonomski efekti su vidljivi u brojnim nenaplaćenim dugovanjima i opterećenjima za vjerovnike.

Ovaj Zakon ima dvije dimenzije – donosi se u svrhu pronalaženja održivog biznis-rješenja za vrhunski sport, s druge strane – stvara izglednost naplativosti potraživanja za druga privredna društva, ali i za entitet, državu i jedinice lokalne samouprave.

### **III. OBRAZLOŽENJE PRAVNIH RJEŠENJA**

#### **Poglavljem I**

Određuju se opće odredbe ovog zakona, te se poziva na druge relevantne zakone koji će regulisati ovu oblast i rad sportskih klubova.

U ovom dijelu zakona se jasno definiše i primjena državnog Zakona o sportu Bosne i Hercegovine u svim onim oblastima koje nisu uređene entitetskim ili kantonalnim propisima.

U ovom poglavlju se jasno definišu dva pravna oblika sportskog kluba a to su:

- a) sportskog kluba- udruženja građana
- b) sportskog kluba- dioničkog društva

#### **Poglavljem II**

Se definiše rad sportskih klubova- udruženja građana, određuje se pojam sportskog kluba-udruženja građana.

U ovom poglavlju se propisuje jednaka primjena zakona na sve sportske klubove-udruženja građana bez obzira na kojem nivou su registrovani sve dok je sjedište sportskog kluba u Federaciji Bosne i Hercegovine.

Ovim poglavljem se definiše da će se na rad sportskih klubova- udruženja građana primjenjivati zakoni koji regulišu oblast rada udruženja i fondacija na nivou Bosne i Hercegovine i Federacije Bosne i Hercegovine.

Također je definisano da svi postojeći sportski klubovi koji egzistiraju kao udruženja građana nastavljaju svoj rad, ali su dužni uskladiti svoje akte sa ovim Zakonom.

#### **Poglavljem III**

Se definiše rad sportskih klubova- dioničkih društava, određuje se pojam sportskog kluba-dioničkog društva.

U ovom poglavlju je određeno da će se na rad sportskih klubova-dioničkih društava primjenjivati odredbe Zakona o privrednim društvima Federacije Bosne i Hercegovine

Određuje se i početni minimalni kapital sportskog kluba- dioničkog društva na 50.000KM.

U ovom poglavlju je propisana šifra djelatnosti koja mora biti osnovna djelatnost za sportski klub-dioničko društvo.

U ovom poglavlju su definisane nadležnosti Komisije za dionička društva i način njenog osnivanja.

Propisan je i način nastanka sportskog kluba- dioničkog društva :

- a) Osnivanjem novog društva.
- b) Preoblikovanjem sportskog kluba – udruženja za takmičenje u sportsko dioničko društvo.

Ovim poglavljem su propisane sve obaveze sportskog kluba- dioničkog društva pored obaveza pripisanih Zakonom o privrednim društvima FBiH.

#### **Poglavljem IV**

Se definiše preoblikovanje sportskih klubova-udruženja u sportske klubove-dionička društva.

Detaljno je opisan postupak preoblikovanja sportskog kluba, upis i uplata dionica, te izdavanje rješenja o preoblikovanju.

Također ovim je regulisano da preoblikovani sportski klub-dioničko društvo nastavlja pravni kontinuitet sportskog kluba-udruženja.

Ovim poglavljem je definisano da Federacija BiH i kantoni u skladu sa ovim zakonom mogu prenijeti svoje tražbine na jedinice lokalne samouprave u FBiH iz koje sportski klub dolazi.

#### **Poglavljem V**

Se definiše postupak ustupanja naziva i brenda sportskog kluba-udruženja drugom licu.

Ovim poglavljem je određeno šta se podrazumjeva pod nazivom i brendom sportskog kluba-udruženja te pod kojim uslovima isti može biti ustupljen drugom licu.

Propisana je obaveza gašenja sportskog kluba-udruženja nakon što ustupi svoj naziv i brend drugom licu, sportski klub-dioničko društvo kome je ustupljen naziv i brend ne može početi sa sportskim takmičenjima dok sportski klub-udruženje ne bude brisan iz registra udruženja u kojem se vodio.

#### **Poglavljem VI**

U ovom poglavlju se poziva na činjenicu da je sport od javnog interesa za Bosnu i Hercegovinu što je jasno propisano Zakonom o sportu Bosne i Hercegovine.

Uzimajući u obzir da je sport od javnog interesa za državu i društvo dozvoljeno je finansirati i podržavati sportske klubove iz budžeta svih nivoa vlasti bez obzira da li se radi od sportskom klubu-udruženju ili sportskom klubu- dioničkom društvu.

### **IV. FINANSIJSKA SREDSTVA**

Za provođenje ovog Zakona nisu potrebna dodatna finansijska sredstva iz budžeta Federacije Bosne i Hercegovine.